

Chor Maschadà Grischun Turitg

Per la fin dall'jamna da sonda, ils 22 e dumengia, ils 23 da zercladur envida il Chor Maschadà Grischun Turitg a siu emprem concert dad uonn. Biebein in miez onn suenter il concert d'atun en la baselgia dils predicaturs ei il chor puspei semtgais per seprestar cun in biala purschida cantica.

Concert communabel cun il Chor da dunnas Egg

Quella gada sepresta el ensemen cun il Chor da dunnas Egg. Sil flyer che annunzia quell'occurrenza legian ins en letras grossas «volkslieder – canzuns popularas». Sut quei cavazzin ein fetg differents geners da canzuns enconuschantas e meins enconuschantas subsumai. In da quels ein las canzuns che vegnan cantadas ensemen dad omisdus chors e che fuorman per aschidadir la clamera dil concert. Leu setracta ei da talas che vegnan cantadas dallas pli differentas caschuns ed era sin bein tontas manieras. Mo egl arranschament da differentas cumponistas e cumponists survegnan ei buca mo in excellent vestgiu musical, mobein era ina qualitad cantica che fa ord schinumadas semplas melodias in'ovra musicala senza tradir igl original e sia ragisch veramein dal pievel.

Quei che pertucca las canzuns ch'il Chor Maschadà Grischun Turitg conta eis ei aunc ina gada in pulit tec auter. Per entscheiver tier las canzuns romontschas ei la differenza tier quei ch'ins quenta sco canzun populara il fatg che schibein igl autur dil text ei enconuschents e che il cumponist ha creau sia ovra aposta per cant da chor en pliras vuschs. Popularas ein entginas daventadas el senn che differents chors prendan adina puspei ellas en lur programs da concert. E tgi sa, forse daventa ina ni l'autra tuttina ina gada ina canzun populara el stretg senn dil plaid, quei vul dir, che vegn cantada empau dapertut en da tuttas formaziuns e magari fetg dad ault, sco la canzun «Fontaunas» da Hans Erni che vegn cantada en ina entochen x-vuschs da tuttas occasiuns.

Il bloc romontsch

Mo gest quei ei buca la finamira dil chor. Plitost il cuntrari. La finamira ei da far ord quei ch'il cumponist ha fixau en notas la musica che el ha giu el tgau ni el cor cura che el ha mess ses sentiments musicals sin pupi da notas. Quei ei adina puspei danovamein quei che nies dirigent Remo Weishaupt vul contonscher. Per contonscher quei ha el ina pazienza nundetga. El lai buca luc. E tec a tec capeschan cantaduras e cantadurs fetg bein el. En quei «bloc romontsch» dil concert figureschan quellas canzuns: Radi da sera, da Gion Giusep Derungs, text dad Aluis Arpagaus; Allas hirundellas, da Carli Scherrer, text da Carli Fry; Per mintga fluretta, da Gion Antoni Derungs, text da Flurin Darms; Sut steilas, da Gion Antoni Derungs, text da Gion Deplazes. Pli semplas che talas canzuns san veser ora a prima vesta e pli pretensiusas ch'ei daventan cura ch'ins s'avischina ad ellas adina dapli ed emprova da far ord text e musica in'unitad viventa. Cantaduras e cantadurs han la perschasiun ch'ei vegni a gartegiar per plascher digl auditori e per atgna cuntentientscha.

Bloc franzos, talian e tudestg

L'auter bloc cumpeglia canzuns ord las regiuns dils auters treis lungatgs svizzers. Duas canzuns derivan en text e melodia dil Tessin. Popular: «Bellezza mia cara» e «Ul Furmighin», omisdus arranschadas en fina moda da Hansruedi Willisegger, cumponist, dirigent e pianist da Lucerna. El ha fundau e dirigiau ils «Luzerner Singer» e retschert il premi d'artist dil

marcau da Lucerna. Il lungatg romand ei representaus cun la canzun «Quand on revien d'ailleurs», text e melodia da Henri Dè, arranschament da Pierre Kälin. Ina experientscha speciala ei bein stau la «sentupada» cun il lungatg tudestg en la varianta vallesana tier la canzun «Weischus dü?». Cheu han ni Sursilvans ni Engiadinais el chor giu miserias da capir, quei ch'ei magari il cass cura ch'ei va per l'auter romontsch: il sursilvan per ils Engiadinais e viceversa. Denton ha la pronunzia gesta purschiu dètgs problems entochen che «Ich glöübu nid...» ha tunau vallesan e buca sursilvan ni turitges etc. Il text da Hannes Taugwalder e la musica dad Eugen Meier s'encuaglian ad ina pintga, denton impressiunonta ovra musicala cura che tut quei che poet e cumponist han mess en quellas per lingias survegn veta. A caschun dad ina audiziun da quella canzun el radio svizzer ha il moderatur detg ch'ei seigi iu ad el tut freid dil dies giu udend quei cant. Nus sperein che enzatgei semeglient gartegi era a nus.

Cantaduras e cantadurs selegnan da saver beneventar biars da vus al concert che ha liug sonda, ils 22 da zercladur allas 17.00 en la baselgia Balgrist, Lenggstrasse 75, 8008 Turitg (Tram 11 e S18 entochen staziun Balgrist).

Suenter quei concert savein nus s'entupar tier in bien sitg cun enzatgei da miervi vitier.

Dumengia, ils 23 da zercladur allas 17.00 en la baselgia reformada ad Egg (S18 entochen staziun Egg). Entrada libra – collecta. Ulteriuras informaziuns: <http://www.buendner-chor.ch/>

Ciril Berther

Datum: 11.06.2013 00:00

Quelle: La Quotidiana

Ressort: Tema

Webcode: 2896363